



Gia dapi onns protestan las mammas russas encunter la regenza e per lur figls che ston ir en la guerra.

KEYSTONE

Recruts per la guerra

In spiritual gida l'armada russa

DA GUIU SOBIELA-CAANITZ

■ En las cuntraversas internaziunalas actualas davart l'Irac tuna la vusch da Russia plitost moderada. Var 15% da sia populaziun è musulmana; Putin fa gia ina «guerra tschuffa» en Tschetschenia e na po duvrar nagin conflict armà en l'Irac, pia a 550 km dal Caucasus russ en lingia directa. Ma mintga schuldà che mora en Tschetschenia vul dir ina famiglia russa en malencurada. Vashels militars agitassan la populaziun viscla e svegliada da metropolas sco Mosca e S. Peterburg, nua ch'il moviment da protesta «Mammas da schuldads» è fitg activ. Perquai trametta l'armada plitost recruts provinziels en Tschetschenia. Tranter Mosca ed il cunfin ucrainais è situada ina chapitala provinziela numnada Orjol (Orel, var 350 000 olmas). Là san ins fitg bain tge che la guerra vul dir. Enturn Orjol hai dat cumbats violents 1941, suenter l'invasiun, e cunzunt 1943, suenter la capitulaziun da la sisavla armada tudestga, ensemen cun ina divisiun rumena ed ina gruppa

croata, a Stalingrad (oz Volgograd). Tant pli chapesch'ins ch'ils giuivens d'Orjol fan tut il pussavel per guntgir la recrutaziun. Bliers allegheschan motivs religius per refusar il servetsch militar. Quai pon ins far perquai ch'il stadi schanegia la Baseligia ortodoxa russa (BOR) sco pertgiradra da las tradiziuns naziunalas. Da l'autra vart basegna l'armada pavel da chanun per la Tschetschenia. Tge far?

In patratg autoritar

Las autoritads militaras d'Orjol han chattà in tric per survegnir recruts. Ellas han sa drizzadas a l'investgieu ortodox da la citad. Il secretari da l'investg rapporta: «In spiritual dueva eruir sch'il recrut saja vairamain in commember cartent da cuminanza religiosa. Sur Mitgel da noss dom è versà avunda per constatar sch'il giuiven obligà da far servetsch militar menta u di la vardad. Bliers refuseschan da princip; sur Mitgel duai als persvader da far lur duair». Il cumissari da l'armada ad Orjol giavischass ina derasaziun dal tric en Russia: «Dapi che lez spiritual ha surpiglià sia lavur, n'avainsa nagin

refusader dal servetsch militar pli» (1). Co po in spiritual cristian far per cumond ad in'autorità militar cun uschè buna veglia? Quai declera ina dissertaziun teologica da l'Universitad da Minca davart las relaziuns tranter la BOR ed il stadi dapi la fin da la pussanza sovietica (2). L'altura mussa che la BOR n'ha betg pudì sa liberar dal patratg autoritar che dominava durant tschientaners sut ils zars e lura durant ils set decennis da communissem. La lescha russa da 1997 davart las religius dat in plaz spezial a la BOR; il stadi lascha valair l'intoleranza ecclesiastica areguard autras baselgias. La BOR «paja enavos» cun prestaziuns sco quella da sur Mitgel per las autoritads militaras d'Orjol.

1) Cità da: Orthodoxer Priester in Gestellungs-kommission, en: «G2W Glaube in der 2. Welt» 02/2003 (ISSN 0254-4377), p. 7. Adressa: Postfach 9329, 8036 Turitg. Fax: 043 322 22 40. Posta electronica: g2w.sui@bluewin.ch

2) Kathrin Behrens, Die Russische Orthodoxe Kirche: Segen für die «neuen Zaren»? Paderborn – Minca – Turitg – Vienna (Ferdinand Schöningh, ISBN 3-506-70794-9) 2002.